

知  
足  
齋  
文  
集

知足齋文集卷第六

大興 朱珪 石君

跋

跋蔡葛山先生文集

葛山師相致政將歸出其詩古文彙示珪校勘珪謹擬  
芟其酬酢之作若干首而存其言之有物者如右曰公  
生平不甯以文詞自炫乃讀其詩文皆有關於性情倫  
紀之大庶幾修辭立其誠者而經史講議十篇則宣公  
之奏議西山之行義無以過之公之嘉謨嘉猷入告者  
亦足窺見一斑矣是真不愧古之立言者抑公之立身

端謹學術醇正淡孚

九重之知而篤非常之

眷其進退本末既無愧乎古人而

恩遇尤非從來輔臣所可幾及況公直 尙書房四十

年其培養啓迪于根本之地者最渙且久 諸皇子孫

曾對公之容聞公之聲則肅然藹然敬信悅服公亦知

無不言而純樸和易使人人意融公之功德又有先于

言者如此然何以能致是哉曰誠而已矣昔蘇子瞻贊

司馬溫公之賢亦以誠字概之不可易也公之性淡泊

自少時得良背之傳于大父晚年蓋有所得而好賢虛

受引接後進忘其達尊于珪尤辱厚珪自丙申入直朝  
夕從公遊者十年時出其狂愚以爲獻而公不拒也今  
將別杖屨求閒過于公戒以名心矜氣之未盡珪悚然  
將銘之心腑而珪且以屏除外物獨超心性爲公進一  
解蓋韓魏公所謂斂神功于寂無者惟公備三立三達  
之美可以參樂天知性之妙也謹于校文橐篋而申言  
之

跋湯葑岡師又占齋詩存

憶乾隆丁卯九月珪初謁房師湯葑岡先生于邸寓明  
年冬先生召飲命賦橄欖詩爲指點違合越庚午而先

生歸里其後己卯珪典試河南先生設教于南陽僅以書敬問起居不獲面壬午先生暫入都而珪遠宦于閩又相左也及珪仕山右辛卯之歲長君寶鴻明府自甘肅見星歸執手涕洟而先生之音容終不再接矣蓋珪之得侍先生者僅三年故于先生根柢之蘊不能盡窺及歲乙未晤仲君賓鷺于京師庚子偕之入閩丁未復來浙今年始以其手鈔先生又占齋詩存示珪校勘珪乃得讀吾師之詩其才力雄肆七言出入眉山劒南之閩闕而押強韻數十疊不懈益振則先生之學富而資深者可見一斑矣先生與海佳宗伯師同年以詩文韻

頗相伯仲然先生宦未達而游蹤所至著作散佚不全其可見者如此非賓鷺之善讀父書豈能掇拾珍重使其得窺麟鳳之角觜于絃絕膠消之後哉謹識顧末不勝慨然

跋王緱山手蹟

余讀弇州文集一則曰本師曇陽子再則曰先師曇陽子竊謂弇州學識淵卓非確有所見何心折于一弱女子耶是日與友人談及此而明日太倉馮孝廉偉人來謁以其手鈔曇陽大師傳見示讀之中卷額手曰豈非機之先兆者歟蓋曇陽子以奇貞至孝而超無上乘真

得魏元君黃庭之正傳其金丹淨識則波羅到彼岸者  
世俗蚍蜉之見或欲滓點太清井不可以昌黎謝自然  
詩衛門戶而闢神怪者比也偉人又以所藏乃弟衡手  
蹟示余中間有爲亾姊辯謗者此又可以解惑矣然眞  
人者呼馬呼牛豈以是爲芥蒂哉

跋蔣秋涇師詩鈔

先生伉直清逸類古之狂者其教人也亟揚其善而激  
其恥珪年十二從學於先生先生一見其文奇之方諸  
古作者閒問珪曰子何志對曰志爲豪傑先生曰嘻其  
次也後七年珪成進士官庶常而兄鈞獨從先生游學

益進初先生獎借珪甚至至是乃亟賞兄而責珪嚴不  
少假顏色然後知先生之善教其性不苟徇于人也先  
生詩筆淡遠近陶韋諸家其本末詳見兄筠所作傳中  
今先生逝矣珪忝竊祿位懼爲庸人之歸誰復面斥而  
繩根之者迴憶童年之嗚陳于先生而先生之貴望於  
於珪也厚不禁泚然汗出讀先生之詩而感槩如昨也  
書馮氏家藏詒狀割付後

馮生秉驥出其家藏前朝詒命供狀割付示予詒爲永  
樂九年九月給世襲武略將軍常山中護衛副千戶馮  
貴者其前破爛漫總詒尾事實稱貴年四十直隸徐州



沛縣千秋鄉周田邨人有父馮聚丙午年四月于徐州  
歸附徐丞相從軍洪武四年撥彭城衛左所二十二年  
聚年老貴代役案丙午元順帝至正二十六年也是年  
四月吳王命徐達克高郵襲破張士誠將徐義于淮安  
濠徐宿諸州皆下是其事也又稱洪武三十二年八月  
隨軍奉天征討克雄縣鄭州攻圍眞定九月接應永平  
十月攻克大寧十一月鄭邨壩大戰全勝十二月取廣  
昌案洪武三十二年建文之元年燕王革除其號追稱  
洪武也是年七月燕王棣舉兵反八月耿炳文討之使  
先鋒九千人駐雄縣中秋夜半燕將張玉襲其不備陷

之又陷鄭州耿軍退保真定燕王圍之三日李景隆代  
將會吳高圍永平燕王援之高走十月燕王誘執寧王  
權于大寧十一月景隆敗績于鄭邨壩皆其事也然貴  
本彭城軍士不知何以隸于燕矣又稱淇武三十三年  
正月取蔚州攻圍大同四月白溝河大戰全勝至濟南  
陞小旗十月克滄州十二月東昌大戰回還案建文二  
年春燕師陷蔚州攻大同四月景隆敗燕師于白溝河  
王幾殆再戰景隆敗績奔德州燕王追陷之進攻濟南  
參政鐵鉉懸鐵板碎王馬首者也及燕王襲滄州執徐  
凱十二月盛庸大敗之于東昌斬張玉王潰圍遁還北

平此云大戰回還諱其敗也又稱洪武三十四年三月  
夾河大戰全勝閏三月藁城大戰全勝案建文三年三  
月盛庸敗燕王于夾河斬譚淵復戰敗績又稱十月克  
西水寨有功陞試百戶案是時大同守將房昭率兵入  
紫金關據易州西水寨燕王引兵圍之又稱洪武三十  
五年正月攻克東阿東平汶上等處四月小河汴河堤  
靈璧縣大戰全勝五月至泗州過淮河克盱眙六月渡  
江十三日平定京師十一月陞武略將軍處州衛後所  
副千戶永樂二年十二月二十一日給與世襲父馮聚  
贈武略將軍管車副千戶案建文四年春燕師連陷東

平濟陽諸州縣四月軍小河何福平安徐輝祖連敗之  
帝召輝祖還五月燕兵遂渡淮陷揚州六月渡江建文  
帝不知所終燕王稱帝此其事蹟也又崇禎九年五月  
供狀稱馮時春係武驤右衛左所副千戶一世祖馮聚  
二世祖馮貴永樂二年處州衛後所副千戶世襲改常  
山中護衛十年給世襲誥命蓋卽九年所頒之誥也十  
五年調羽林前衛左所副千戶十八年病故三世祖馮  
得襲職景泰二年病故天順三年四世祖馮旺襲職成  
化二十年病故高祖馮清襲職嘉靖九年年老曾祖馮  
經襲職萬歷四年年老祖馮九思襲職四十八年年老

父馮應魁由萬歷丁未年武進士歷任遼東遊擊未替  
將嫡長孫馮時春襲職案所副千戶從五品明制自衛  
指揮以下皆世襲也又崇禎十六年五月初二日兵部  
劄付爲屯田收穫已竣事戶部尙書傅題前事奉旨這  
聖屯著效各官委宜覈敘吏兵二部著卽與議覆欽此  
部議胡文顯等一十九員獲息均逾二千石以上應各  
加一級奉旨是劄給署副總兵加一級馮時春案史七  
卿表崇禎十五年傳淑訓任戶部尙書十六年五月削  
職是年五月兵部尙書張國維免馮元颺接任蓋議覆  
者猶國維也時春於秉驥爲高祖生若京若京生宗璋

宗璋生紀紀生秉驥自聚至秉驥凡十四世案馮氏自江南徐州遷于順天終始明代以武世其家自元至正丙午訖今乾隆乙巳四百二十年之系確然可考者賴此三紙之存其與世之家乘証引附會者相去奚啻徑庭哉馮氏之子孫其寶而弄之以爲徵信可也

書盧中丞尖山壩工紀略後

憶年童齒時見浙人來京師者津津道浙撫盧公之仁且賢咨嗟歎息十口一詞然不知其何所措施而得民如是之渙也比後數往來于浙欲訪其遺事而迤邐越數十年傳聞異詞迄未得其冒繁今年公子介軒隴使

奉

命來杭相見恨晚既詢悉其實復以所輯尖山壩工事  
略示珪盡卷讀之乃知我公經國勤民落落大者非  
僅以仁言惠施姁嫗市民者可擬也案尖山當海寧東  
爲江水逆流海水上潮之隘舊有石壩鍵其衝歲遠工  
隳我

皇上承

世宗丕謨奠蒼生於安宅

申命大吏及時相度而公適丁其會老謀獨斷

天作地符不數月而大工集

御製碑文鎮壓巔澁自後

翠華六幸接建石塘亘萬餘丈鱗排屹峙以成南圻北  
漲之勢然其根基實肇初于尖山所謂非常之功必待  
非常之人者揆厥所由公之功真不朽也傳言立德立  
功立言如公所立不已得其大哉重介軒之屬輒述此  
以誌來者

書孟子四考後

予在杭時海寧周孝廉耕厓以所著孟子四考示予校  
勘比予將行來索則爲僕人誤束諸書簏矣及到京師  
耕厓屬蘇生琳趣此藁甚迫已託阮編修元爲予作題



辭應之然鄙意本欲有所質于周君故復申之竊謂孟子道不行退而與萬章之徒著書七篇皆實事也非同莊生之寓言與戰國策之錯記諸國事者故當仍以本書爲据孟子言由孔子而來至於今百有餘歲孔子卒於周敬王四十一年壬戌則孟子之生當在周安王世是矣又言由周而來七百有餘歲此語發於去齊之歲燕人既叛之後案竹書爲隱王元年丁未竹書以武王十三年壬辰周有天下至是當七百九十六年若以通鑑已卯爲周元年則八百餘九年矣殊不符也閻百詩不信竹書而信史記司馬溫公取竹書惡三改元之事

顧氏曰據紀年周慎靚王之二年而魏惠王卒其明年爲魏襄王之元年又二年燕王噲讓國於其相子之又二年齊人伐燕取之又二年燕人畔而孟子之書先梁後齊其事皆合然孟子在二國皆不久書中齊事特多又嘗爲卿於齊當有四五年若適梁在惠王之末而襄王立卽行故梁事不多謂孟子以惠王三十五年至梁者誤以惠王後元年爲襄王之元年也竊謂孟子前二卷卽其自敘去就先後本末之跡故始于梁惠王而襄王而齊宣王而鄒穆公而滕文公而魯平公論世者當以此爲仿或謂滅燕者湣王孟子曾再入齊見湣王夫

孟子自言久於齊非吾志也而惓惓於王由足用爲善若潛王者烏可與爲善哉又孟子言公侯皆方百里太公周公始封皆方百里今魯方百里者五與子產諸侯一圻之言合而與馬氏千乘之國方三百一十六里有奇周禮封侯以方四百里明堂位魯封方七百里諸說大相徑庭竊謂亦當以孟子爲可信何也孟子與慎子辨而斥其枉所損乎若所言不實則慎子將掩口而笑之曰子不聞周制封侯則方四百里乎何不讀周官耶故鄙見以爲周禮疑非周書也況地里古今相距不甚懸絕可案跡而稽也昔秦使道出山東者屢矣自東平

州四十八里渡汶河齊魯之交界也十二里爲汶上縣  
九十里爲兗州府治之滋陽縣又三十里爲中山店又  
二十里爲鄒縣徑魯境者計不過百二十里耳案今曲  
阜卽舊魯國都自曲阜而西三十里爲兗州府又西六  
十里爲濟寧州又西五十里爲嘉祥縣獲麟堆在縣西二十五里又  
州西北百五十里爲鄆城縣舊城在縣東十六里魯西境也成四年城鄆是  
魯之西境得二百二十四里自曲阜而東六十里爲泗  
水縣又東五十里爲卞城魯卞邑又沂州府之費縣在  
曲阜縣東二百四十里蒙山在縣西北五十里是魯之  
東境不過二百里自曲阜而南五十里爲鄒縣是魯之

南境不過五十里又魚臺縣在府南百七十里武唐亭

在縣東北十二里矢魚於棠遠地也又單縣在府西南

二百十里魯單父邑是魯之西南二百里而強也自曲

阜而北寧陽縣

莧裘在寧陽西北

在府北五十里

魯闡邑

又東北

九十里曰鉅平城

魯成邑

又府西北九十里汶上縣

魯中都

又府北百三十里泰安府是魯之北境百四十里而近

案魯之東西約共四百里其南北約共二百里不能方

也此則兼井之後所謂方百里者五近之實不過方二

百十里有餘耳想其初封蓋方百里而贏焉馬鄭周禮

明堂位之言不如孟子之近確也

書吳雲亭觀察家傳後

吳編修其彥予已未主會試所錄士也奉其尊人中允公命手迺祖雲亭觀察家傳示予請書後案傳爲韓城王文端公撰諸城劉文清公書予官粵東後不遑公觀察廉使時事傳稱其誠實子良韓城公端人也其言可信予雖未見公而中允屢典學有聲編修能文益信善人有後易文言傳曰積善之家必有余慶其是之謂乎記曰將爲善思貽父母令名必果然則固始吳氏世濟其美不隕其名使觀者咸曰善不可不爲真不愧雲亭公之子孫也豈不懿哉

祭文

公祭阿文勤公文

嗚呼天生我公堯岳舜鄰星飛日抱龍虬之津白山高  
高綠江無垠眞宰御天從下麒麟生而神穎太阿照把  
及其知書三車炙輶鍛金烹玉胸作大冶放手萬言天  
河倒下弱冠自鄉舉于春官串貫五經二十三篇  
仁皇聞之喜動

玉顏

召見宣室公卿聚觀遂除翰林侍從 禁省甘泉五柞  
莫不從幸射鵬奏賦左右手竝

天子奇之待以軸鼎典禮與政以佐太宰直聲清德耳  
傾觀改宣布

明惠三使東海搏桑照曜想見風采在昔準夷負阻未  
通往諭厥酋擁眾見公獨前叱之氣如白虹賊起謝命  
再使益恭惟公之忠

天子心重萬里百粵千城是董溟海春天牙纛飛動潭  
潭我公不驚辱寵起官執法乃兼司成貳秋冬官考工  
明刑師門北落是司天兵或號而啞而寧不撓

皇曰都哉汝試其可惟我庶獄敬忌敢惰惟汝司寇弼  
右輔左無敢出入無敢偏頗臬陶庭堅是作禹相周公



召公大雅始唱相公兼之與古頡頏權衡蘇呂冠領雄  
向自公少壯大文赤黻比登三公手鑄萬物前後十科  
龍般豹蔚天下仰公杓高山峴休休其心藹藹其言愛  
才進士若將或先非惟知之心平醉焉美哉我公古之  
大賢何以佑之天壽平格父子中書同堂舄奕諸孫睨  
睨鳳觜鸞翮休沐養疴暫許君爽

帝心方眷天休其滋引年憲老賜藥遣醫三槐在蔭四  
環如脂耆英社中潞公委蛇如何不弔喪我耆造星回  
三台

帝軫一老我儕受知歲在丁卯同聲哭公零淚如潦

公祭梁薌林師太翁文

嗚呼天之篤公既厚且醲鞠我相國而康其躬相國歸  
養無違色容天光照曜迄于考終惟其有之是以受之  
必有隱德源流經支自其少壯爲文陸離抱玉不售溪  
藏嶽巖中一謁選爲縣學官棄去不就老我考槃惟此  
詩書教子及孫鴻冥螻屈蔚爲龍鸞相國起家射策大  
甲慶雲在天五色開霄論思中祕金泥玉押扶桑沐  
日功高道洽

帝之元年普

惠天下公初拜

恩冠義佩若相國受知登合閒社三命益恭以篤公嘏  
相國有兄繼爲翰林侍公于家無心華簪扶持杖履湖  
山登臨公倡子和千篇鏘琳公年七十有加 賜袞

帝寵以詩堂槐三本喻公若祐世德長遠公拜受封  
綸言煌焜其後相國遂參政府左右密勿協心弼輔公  
年彌高神明不迂教成忠孝以大公戶歲在辛未

帝車指南公迎道左彭鏗老聃問年八十晝接過三晉

秩 宮師

錫宴億湛于其明年相國上言

呈帝大孝敢祈私恩

天子俞之歸侍晨昏 國美家慶傳之勿諼公孫盡貴  
少子又舉世所希觀公取若予黃髮元老滌臉撫屨彩  
衣壤子瑤珥戲舞再返 鸞旗載

錫龍光公之榮遇非古所嘗婆娑大年神仙康彊脫屣  
歸去白雲之鄉我儕小子受經相門未登公堂仰公龐  
敦遠望南極熊熊魂魂公神格思鑒此諫言

祭王文山先生文

代作

嗚呼公之敦行旣久而章于家于國作其棟桷惟天生  
之其意厚將經法天下自此浙杭浙惟世居光以遠耀  
在公之先實有大造投身虎牙活人于蠹全陴而出如

翼以菹故及我公其德彌膺左右俎豆周折規矩自其  
性成與道無齟匪張匪弛若承其附幼喪母慈聞聲而  
慟至令諸孫蓼莪不誦事繼母疾刲臂作湏其疾去身  
赤火燒凍哭父粵西祝融寒號奔喪萬里山峯如刀援  
鶴哀墜萬仞下高三年泣血今之參羔管寧穿席仲舒  
下帷肉貫六籍敝屨百師瓜副漢宋磬折孔姬皆通于  
行非華之擣錢塘相公與公執友館公于家十年有九  
季長道尊孺子義厚宮尹諸昆皆公口授洎平強仕始  
舉自鄉般般龍鵬爲國之光無藉而襲欲登圭璋赤莖  
珊瑚不羅于網相公薦賢乃官國子天子視學禮樂所

始以齒德教升造秀士昌黎四門山鑱斗指玉磬在堂  
石鼓在下五鐘四縣夏琰殷竿公皆志之富若數馬竈  
其根源派別若瀉鴻文大禮紀之于書門開戶張登降  
翼如自明嘉靖年二百餘公手是卷勤于充符或好議  
論罷祀陸王蟻撼大樹笑不自量公口懸河辨于司成  
嗚呼大賢非公孰襄故天下士爭爲公徒如登龍門鱗  
綴萬珠乃知賢人同心所趨吠雪自怪晞驥自殊公之  
著書多於三車周易孝經入聖之家事親見天陰萌陽  
芽其餘鉛槧萬龍一牙公敏于善不可以數或貧而疾  
或窮而旅新鬼求榘枯骨思土如忘如安曰公是主其

行既備其教更至故天報之子才而貴

至尊親擢連掞得最出使南海入贊大祕公久欲罷爲  
諸生畱力疾數年乃得乞休伊川旣老壯苦忽瘳方期  
大耋彭錢可求公之食德亦未云厚公老而傳當更益  
壽晨吐雄文晡忽彌畱遽然而化理不可究公之同僚  
視公依放公之門生操公几杖典型雖在老成焉往豈  
獨私悼天下曷仰

祭勵衣園光祿文

嗚呼公生世家望于靜海文恪文恭左右眞宰瓊山珠  
宮神仙所在騎麟下游爲國章采公年十七起家詞

林時呼小鳳不數向歆旣貴乃娶孰諧丁王崑園侍郎  
金閨綺琴公方風發火色騰上受恩

先皇國士無兩蚘芒星氣不汝撓枉天光盪摩俾出高  
朗遂自禁臣視學山右賜汝封函莫不聞奏再以繡衣  
鋤強剔覆大官有司怵惕偵候謂公是非

天子鑒之作予耳目不汝瑕疵公方盛氣敢于有爲海  
鯨傳翅扶搖下低再起寺卿作貳中書有加寵命我  
皇之初司寇宗伯協調輦舒鴻儀鉅典經綸魚鳥中罷  
益振

天子所眷乃厖



帝車乃值 祕殿邇英密勿宣室清燕凌台挹斗莫之  
敢先況公長公繼爲太史四世清華莫與比擬高明之  
家隆隆方起盛衰循環老我山水七年家食起官玉堂  
迴翔卿月玉山頽唐淋漓詩酒風雅獨將感激

渥恩中座涕滂公之書法今之楮虞片鱗斑斕珍于球  
珠年老筆肆放意自如流傳雖林翁豈囁嚅嗟公之才  
魁質鸞章噴風排霧不自遏藏光祿之遷

帝眷莫量誰撼喬木使我慘傷聞公易簀朝服簪筆書  
空作疏更謝同列大衍小劫我化無怛去來了然哀樂  
不悞公其化人暫下富貴浮雲如玉其人容裔瀛海同

舟望公颿逝招公歸些瓊廡一醜

公祭陳給諫太翁文

嗚呼火敦百井實爲河源豫章連抱溪其本根非泉曷  
流非漸曷蕃公世其德而大其門公之王父在明陽九  
調于鄉里不責其負改歲之月閉門卻走無俾負者還  
我而忤有王姓者鬻女以償徘徊于門不得自將或告  
之故泣走皇皇贖其女歸感而涕洟流寇焚駭廬江是  
掠公伯與父爲賊所獲殷其兄肱徽弟以索自廬馳皖  
虎口踴躍皖賊叱黨爾其斫此黨以刀來怪問姓氏標  
刀大慟陳氏二子解騎送還贖女者是公方五齡居父

之憂牽母與兄長號不休母憐子少吞聲暫收提之他  
去還聞啾啾逮于有室喪其兄嫂零丁孤姪朝夕哺抱  
母聆孫啼色慘中燥偕婦跪請勤心襁褓母也思子疾  
不可爲叩頭呼天天高不知乃手庖刀割肉淋灑投之  
釜中以作母糜糜不得熟母兮奈何剪肉如菽啓噤進  
和膏旨有聲終夜無吽遽然起視漸失痼疴更歲十二  
母乃考祖公初割臂如無剝膚豈其神明左右嘯濡求  
仁得主血氣乃奴公自少孤讀書未竟念我先世積善  
餘慶二子侍側無怠恭敬仲也傳經治生有孟天之佑  
善數世而昌惟仲早達舉于厥鄉遂來射策長離高翔

天子所使官以庶常仲歌采蘭循陔曰歸綵衣稱觥眉  
壽有輝公曰汝北無以我違汝無野伏而朝扇翬

天子錫類受釐

王母金苞鳳凰五采吐綬

王言如綸公拜稽首嗟我先世光遠德厚仲自翰林遷  
于臺諫擥英南宮校書東觀讜言書思不爲詆調繡衣  
持節出司漕運仲往迎公公曰余來潞河之清以矢子  
懷鸞曜齊眉蘭芽滿堦秋風起兮余其歸哉仲跪而請  
公曰汝母我思翩翩非爲尊鱸汝母之北念汝嫂吳前  
年刺股母愈嫂癰仲不敢畱攀舟析津望雲南斗傾日

北辰復拜

使命遂轉掖垣仲何

天休公頤大年嗟公之年未當期頤天之報公如川始  
漸公何厭世棄之若遺人失耆英星歸少微嗟我同人  
與公頤頤知仲而弔知公而傷湛思曾閔潛德曷彰孝  
旨如醴以升馨香

公祭同年印淞汀吏部太翁文

嗚呼江左名賢粵西大尹桐社神歸德星宵隕公以孝  
行重于儒林赤璋白琥鬱爲國琰

世廟遴賢旁求若渴茂才異等首膺薦拔褐衣入

覲銅符出宰嶺雲鑱天石城壓海鉤距神明盜藪廓清

柔以教化而父而兄或不孝慈公不鞭笞耳提面牖相  
持而悲惟其至誠無恚不動誰爲鷹鷂公眞鸞鳳乃遷  
廣寧猛虎遠遁隄三百里列竹樹隄山田初耕無擾我  
氓請于上官不加其征鑿池于泮平囚于犴公或疾病  
一邑走汗二年高要再遷東莞東莞之東巨海門限虎  
門獅洋連牙露杖武夫愕眙欲介而往公曰無爲我行  
詰之攢鋒照海獨前指撝嘆咭喇曾挾呂宋俘長風飄  
來饑窮號呼諭以解怨歸俘于呂葺船給食反其國土  
大吏上狀

天子建之分符鴻門擢公同知叻呷啞商載重入口咭

喇六艘欲攫其後公廉厥姦先聲奪人飛艦出海羣酋  
墮魂凡公之政不綵不競動若發機載以清靜中罷復  
起移守粵西颶風蜚雨化以甘祁十年囚簿一視而剖  
魚鹽疏漏公歸何有民有怨家搆興大獄公雖去官懷  
慨抱贖公之用心其後必大鳳凰老去鸞鵠爭翮方啓  
高門忽然厭世公何歸哉神仙翺戲我友考功出後宗  
子衰衣禮割見星哀始嗟我同人曷慰莪悲生芻一束  
敬致誄辭

祭沈未齋先生文

嗚呼我之母家爲公本宗公後于姑出門有功會稽幾

峩析津淙淙白源而委至于海邦公以信義觀時取與  
謀若伊呂無畱無處猗南十年積居廢著貧交疏舅我  
飫我清旣穀于躬聿敷于子匪簠匪畚有經有史闔其  
家聲雖雖濟濟苗其庭除蘭芽玉珥或宰雄緊于江之  
南或馳遠猷起家孝廉彩舞日愛

綸恩天覃君子抱孫總角盍簪公篤本支命二子歸兩  
姓似續世奉禰祠公之純孝繩繩德基高門豐閭苞茂  
自茲公年旣壽神明逾旺安車遨遊行不以杖公私倚  
毗鄉國齒讓詩歌酌斗禮稱執醬方祝期頤鮐鰓無艾  
如何不弔鴻冥鳳翽厭此喧卑遽淩埃壒自非中郎誰



銘郭泰望望津門百里而遠四方上下招些不返者舊  
祖矣我心繾綣敬致生芻以將哀輓

祭劉文正公文

嗚呼惟公正色立朝一心格

主天下倚之爲泰山

天子膺之爲心膂贊刑賞秉鈞樞宣

一人之德端士大夫之趨其清風剛氣凜乎不可撓而  
勇與萬物寬然而有餘蓋公之得于天者厚而成于學  
者不可誣也

上眷公深且久經綸密勿歸然壽考其脫然厭世也

上卽日臨其喪海內聞之若隤山而傾斗公之子賢且能文門生學士徧于朝右其所以發揚公之功德于不朽者豈藉此茭茭覆瓿者哉顧珪早辱公知尙記公之一二逸事嘗乙夜退直宿于翰林之西廳時冬嚴寒或假公被辭之危坐假寐或異之徐曰錦鯨卷還客始覺心和平珪私議曰公之潔身清操蓋庶幾乎斯言而無愧及珪初爲監司謁公請所宜公曰子知之子不憶子與某圍碁乎某隅竊于東子顧而之西不劫劫以爲奇也珪曰謹受教嗚呼公可謂得大儒之規矣嗚呼公有李文靖王文正之清剛而躬逢

堯舜協于明良無門戶城府之私而士氣遂有惇大正直之德而元氣昌珪方讀杜甫八哀篇聞公之訃不覺感余襟之浪浪生芻一束箕尾灼灼公真不沒其何以不辱公之門牆

祭劉東明文

嗚呼名都大邑必有望族蕃衍宗生豐林喬木高門著姓必有典型國之老更鄉之耆英潞惟幹州處者爲劉奕世鼎盛宗敬族收翁齒耄耋耆爲尊輩行諸子從孫球琳玕琅翁不充詘好行其德何有何無于我保息翁勤教子左詩右史豈其經籙不如韋氏我初識翁潞河邈

追乘馬班如重以婚媾長君學成旣歌鹿鳴不負庭教  
逢年力耕昆征弟邁芊芊衿佩如蘭茁芽不糲蕭艾振  
振多男惟翁有之衮衮積善惟翁久之謂翁康強引年  
方將婆娑槐蔭爛漫榆光如何厭世脫然杖屨白雲飄  
飄何來何去逝水成川觀河不改生芻一束翁乎如在

祭李郁齋少宗伯文

嗚呼我友相國文貞公之曾孫而少宗伯穆亭公之肖  
子也高明之家世濟其美不充詘于富貴而循牆于詩  
禮其行也恭其處也士蓋粹然儒者之養而淵乎若江  
海之有原委自初發策選翰林是時同館者閩有三人

梅崖獨攻古文詞而公與繩菴鴻臚爭以實學磨礪不苟爲琅琅麟麟蓋鼎足而力均旣而擢侍讀掌宮坊分校春秋典試舉秦拜中州督學之

命將搏而蹉再起益振自中允而躡詹事晉內閣學士曾不踰年

天子眷忠貞之有後而知公克繩其先也乃貳宗伯司空衡文江南視學浙江是穆亭先生之所官也

上念公母老曰閩浙壤接而風鄰便汝養也嗚呼

教孝之

德意稽古之榮光太夫人用名其亭曰再到而考終于

杭公扶歸安溪治其松楸而修其宗祊以示子孫不忘  
服除起家視學北直實文貞公之所卽公教士子惟先  
公則六經五子水滸繩墨左右春卿堂構降陟兼理樂  
部夷夔之職嗚呼公在官敬而交友摯與之游三十年  
不渝其初相識也每當風雪之夜尊酒談讌陳義責善  
諧謔閒作聯吟道古同人磊磊如晨星心相得也今春  
公薨

慈聖大事夙夜盡瘁心力乃得眩瞽之疾請急數  
月拜疏乞罷

上咨詢久之乃

賜告且望其復起也柰何年未及耆遂超如脫屣公之才器所成就發摠僅如是耶子孫林林其後未艾而朋友落落又失一元禮耶曷以舒吾儕之悲思庶鑒此情之妮妮而已

祭陳來章少廷尉文

嗚呼公之際會可有爲于天下公之言行斬不愧乎古人胡未訖其志而嗇其壽年在逃聞者且以爲憾而況情好之素敦憶昔射策歲在戊辰越今三十三年存者如星向晨公起家黔嶺紹定齋先生之家學軌躅平瀛洛關闢于經書貫串心得口解如懸河之注析津漱澣

發辨排繹老擇義利捍如山岳晰如漣淪自爲翰林典  
試蜀川及改御史遷給諫指事敬陳巡城視漕利病肫  
肫嘗曰必懇惻而有條理乃仁人之所存中間居憂見  
星而奔涉湖江而上牂牁安先人之窆窀穸遂講學于武  
甌必魯鄒而後言訂朗江之學約中婆娑者十年丁酉  
重來信道益專參議通政退食儉貧知交落落風古莫  
攀二三舊雨嵯磨淡純讀書教子忘其饔飧今夏受  
特達之知擢少廷尉而晉卿班拜

天光于行殿接前席之

恩言



上方嚮用公將行其所學而豈託諸空談胡爲邁此厲疾溘埃風而上星躔嗚呼諸郎林林清德貽孫公其寧矣後死者何以質素心而弗誼公其有知鑒此誄文

祭同年紀文達公文

嗚呼九河之靈龍虢之星降神閒氣熊熊熒熒維公祖考夙有陰德出粟賑鄉活人溝洫河身有物中夜流光公生光隱實鍾厥祥公少英特棄武試文博學奇葩遂冠其軍丁卯之秋駢儷萬言兩相賞奇褻然榜元甲戌高第文昌學士爲友受過河源萬里生入玉關總持四庫萬卷提綱一手編註五掌蘭臺再宴千叟司馬宗伯

政禮之首八旬有二歸然靈光遂參政事倅雍湯湯  
宮銜晉秩旬有八日脫屣歸歟坐不煖輶同筵五老電  
掣虛三公歸無所河北斗南鹿鳴三章鳳柯一葉魂兮  
歸來風露厭浥

祭竇閣學母太夫人文

代其門生作

嗚呼洵妃成國鄭母歐陽夫人兼之與古頡頏澄義所  
浴日文月章天地之美觀其所生故惟夫人作君子儷  
椎髻布裳匪良其袂熠燿明經絡緯驚製朝耕夜書倣  
于雜佩瑯邪之山東海之島靈仙往來儵眴感兆金鈴  
四垂綵旂五纁麟角鳳喙孔釋送抱惟我夫子幼而岐

疑能爲范滂不愧蘇軾目不再覽如鳥去弋夜夢神言  
丹白篆赤登于天府升於秩宗其惟吉士

天子所醴素車驥乘或徒而楚馳其文筆天行飛龍子  
雲奏賦子淵作頌白鳳肉飛碧雞影通魯失靈光楚無  
雲夢十吏傳書三館推重天之單厚集于厥家大王小  
宋前揆後葩老鳳將雛騰翥赤霞夫人綬之兩世孔嘉  
夫子之文旣閔而肆張其侯鵠十鳥下羿羸劉之先李  
趙之季以古文變爲今文制一遷宮伯再主翰林使于  
晉楚西南盍簪俯臨湘漢仰觀觜參波瀾放蕩光景動  
侵欽陳巨麗遂擬京都推怒潮汐卷舒江湖火房龍國

烏烏魚魚

天子讀之以爲莫如受茲介福于其王母 丹鳳門高  
金爵吐口手五色雲爲二老壽佩龜買魚北向拜受三  
能中明北斗璇在 同賦昆明夜珠得再黃扉坐參宣室  
入對絕地 狝天閭闔不闕豫惟土中崧惟嶽尊天地文  
理元精 崑侖命公造士華實旣擧人之從公如化鵬鯤  
青豫相距不遠其竟夫人肩輿往來送迎況有肩壽舉  
案相敬其來方將如月之恆如何薤露忽聞告哀起居  
胡患陰陽胡紆天之報施厥惟初哉誰爲司命蓀胡相  
催凡我從游竊仰母儀登堂誰拜及門誰闢蓼莪廢矣

空此瓶罍生芻一束以慰參柴

祭李母某太淑人文

嗚呼蘭山東南黃河西北風沙欲歎實生偉德惟李將  
軍淑人之特猿臂飛聲鵠林比翼夫子從軍踰關而西  
萬里食肉何以家爲日出上堂月明照闔盤飧刀尺淑  
人孝慈我征梁入道渴絕水俯臨溪谿莫敢側趾公下  
取之盛以有頰一軍從飲莫不甘美賊衆薄我于召木  
多登山擊之火轟霆摩血光照曜來如蜂蛾日落見星  
寇淡若何公謂同袍彼衆我寡我不死合賊豈生捨大  
呼下馳碎易萬馬賊以礮攻雷破豁間且伏且前飛火

燒背起與賊交鏃攢刃碎我軍乘勝賊乃大潰是時戰  
功以公爲最同行者高弟失厥兄公還得之負之而乘  
賊追及我鎗交於肱回身刃賊莫我敢爭

天子嘉之官公于鄆百夫之長廿年一汎功高位卑色  
無喜愠淑人襄之教子有聞初公未壯建此大功年垂  
六十自阿移蒙嗟我未老據鞍生風朔方用武有章薦  
公乃授守備擢之都司四郡饟械惟公治之七年于邊  
神瘁力疲玉門未入虎頭不歸振旅敘勲勤事第一  
帝聞咨嗟稽典用卹羽林字孤蔭子有秩官爲治葬  
問家室著籍于官喪來蒙陰淑人哀毀頽岸傾岑顧謂

諸子知而父心 國恩家難敬哉思漢子孝不仕養母  
教子天佑忠臣克昌其祀淑人之孫翰林御史三世桓  
驄神明上齒將軍克忠淑人惟孝鸞停蘭茁淑人之教  
春秋八十孫曾繚繞中更盛表明德有耀如何厭世攀  
箕附尾西望龍堆同游萬里我交令孫登堂晚矣寄辭  
遠奠以昭彤史

祭同年馮孟亭母孔太宜人文

嗚呼宜人之先明德之後麟角鳳觜雖遠必復婉婉于  
親詩禮自秀盛年高義光耀孔楸惟宜川公司寇之子  
感彼莊缶長歌浩水傾聲比律德音伊邇其來雖難歸

于馮氏宜人之來桐華始縣夫子出門秋露被蘭二時  
靜好雜佩珊珊王畿結綬豈敢晏安宜人有子石麟在  
抱公官于西雨雪就道丞哉丞哉負公燥燥鬼神厄人  
奇疾曷禱宜人聞之千里相望疾苦傳聞不知其狀舅  
以官罷歲饑孰饌藏廩在頰兒啼母愴四年公歸兒已  
五齡相迎于舟解頤分馨奇士矢志膏肓不寧扶持視  
聽于無聲形舅再起家官于江南子婦率孫偕來甚湛  
起居堂上龜勉苦甘如何我心匪憂如惓自子四歲早  
授之書有不能讀泣涕漣如汝父甚病汝不自劬哭而  
杖之讀且有譽母或邁厲累旬始瘳起召子來汝胡憊



游某日某書曷熟曷不子大驚怪曷知其由惟其夢中  
魂魄所以惟其精誠式穀是子古稱賢母教子三徙豈  
若宐人生死在是果然穎達十八舉鄉侍郎致政歸而  
常羊喜孫先鳴子其康強豈知不弔遽此殞傷宐人號  
擗百身莫捐事我夫子十有八年嘉會半載殷憂終天  
子隤而請艱難相全子館于外母勤于家事舅敬養殯  
禮有加曰汝祖貴嫡孫匪他無以貧故有悔若何子困  
于試南北竭來宐人勵之無以自欬乃成進士文辭馬  
枚承

恩王堂歸賦南陔奉迎宐人就養京師有聲翰林分校

璵闢出使大邦羅其瑰奇遷于御史牙服光輝宜人孝  
慈自其性成前母遺女愛如所生或嫁而寡相依惻惻  
鳩鳩在桑其儀均平性樂爲善行之不倦或撫貧子直  
偶是援族人無子贈以婉孌宜人之德其後有諫是以  
神明期于上壽諸孫繞膝蘭芽玉秀 鳳闕 龍光襲  
封旣厚從容天祿如何有咎八風胡傷二豎爲祟遲我  
登堂翻聞致槌傷哉我友孝思不匱文不宣哀鑒此奠  
酌

祭同年邊秋崖母李太恭人文

嗚呼邊氏之先厥有大功假手斲蛇以還

六龍族居潛德累世而豐將奮乃跼在我贈公公少好  
學父母所喜乃擇冢婦御輪于李雞鳴上堂進退有禮  
惟太恭人實生令子公出授書歸而事親提攜左右樂  
忘其貧如何昊天奪我良人伯兮十二仲也九春顧此  
兩孤上有耄舅死則不可生豈永久幽殯在宮一燈穿  
牖兒衣兒讀予手予口舅旣善病甘旨必求龜勉有無  
以春以秋曰新婦孝心酸涕流我不見矣我孫其酬葬  
舅及姑夫君是窆三喪克舉生者無歉天道何期于茲  
將驗伯賢有孫仲勤鉛槧自贈公沒歲在戊申十年仲  
舉廿年出身

帝選庶士蔚爲詞臣艱難母教以昌先人我來京師  
國恩旣集拜受

絲綸母年六十英英衆賢子之友執登堂介壽詠歌懌  
輯仲勤干官雍容有聲橐筆右史授經承明屢擢清要  
星槎遠行仲容稟秀出宰江城再稱壽觥再膺

帝詒秀眉覲齒七十未耄蓬瀛學士視學海嶠版輿就  
養載娛色笑道經九江戲采有孫羊城稅駕花穠錦瞰  
子雖馳驅無閒清溫況有伯氏方來更番恭人苦節食  
報之始源源世德流泉出汎庶幾大年宜爾子孫胡爲  
不弔乘雲脫屣吁嗟我友風號木催暑寒川陸萬里北

歸誰能不慟名成親違何當執紼絮酒致哀

祭王母李太淑人文

嗚呼母慈子孝天性之常而繼母之于子非淡于義而篤于性者鮮克無間而益彰惟我太元王公孝友純穆貴而不衰老而彌竺明發孺慕念茲鞠育人以爲賢而忘其不出于腹公曰我母慈我如所生初我失恃妣夢于先君曰其憐我嬰邑有李氏賢女可以問名以慈余子余魂其寧君寤而噩曰有是哉使嫗往問視李外王母曰嘻嫗來求女乎嫗錯愕莫對外王母曰否余夕夢汝先夫人來曰將以吾女爲娣嫗歸以告莫不驚歎涕

淚泚泚及母來歸撫吾兄弟不知其爲異體也母告余  
曰我學于汝外王母外王母繼室也吾父先有子及母  
生吾弟始孩兄抱弟戲墮地裂腦死母慟曰汝父知之  
是般兩子也泣告吾父曰我失手死之故汝舅之孝于  
外王母其心懷矣嗚呼有李母之慈乃有太淑人之慈  
有太淑人之慈乃有太元公之思是真不負神靈之介  
婚其事更奇今太淑人相夫教子俱爲名卿而含飴繞  
牀壽考而歸于帝鄉傳兩家之遺事千百世其逾芳敢  
陳此辭以告幽明

祭徐舅母婁恭人文

鳴呼我之母家諸舅零丁歸然靈光惟我冀寧我母見  
背我思悠悠孰與母近惟舅母妻憶母在日兩家往來  
依依周親嬉嬉始孩我母屬續泣隕如雨曰外王母客  
棺畱楚能返葬者乃我之兒我死瞑矣兒其勿思回眸  
指篋哽不能語瞋然魂升長慟終古斂而啓篋有金五  
百昏昏不知誌此易簀我舅曰吁是誠在我迎喪歸葬  
母魂用安曰姊之金爲葬母資遺我不受舅母知之我  
母純孝我輩不肖舅姑同心實有大造我父之妹妻我  
母兄曰聽山公官臺灣丞哦松雙摧二女孤危舅母女  
之室家于歸母謂舅母我女爾婦彼玉未生此蘭不壽

先君謂舅無恙舊姻故筠之女嫁舅之孫珪官太原舅  
先作守戊子之秋親串邂逅舅擢監司我遷于藩官署  
比鄰無閒雨暄舅耽禪悅母喜疏啜勸善孜孜慧生于  
潔達旦不寐日旰不餐或談名理出天入泉克相我舅  
龜勉相規談言微中如弦如韋舅朝于京以室盡行  
惟堂惟垣款款親情舅旋于官母畱津門侍養老姑以  
晨以昏今夏母來珪謁于相告予以夢如遊閬苑化身  
幼女御風而西心無罣礙洞天琉璃遽然而覺環守在  
牀乃知化人不戀其鄉七月八日舅行視水越夕走告  
恭人病矣珪往問疾氣厥不蘇終夜徘徊及辰而徂斂



而舅歸憑棺長號終鮮兄弟情淡義高嗚呼恭人厭世  
脫屣若持內觀不滯牀第或神其因曰水晶毬嫦娥簪  
弄孕于中秋月輪在天其光四照神其格思鑒此清醮

祭徐外祖叔母丁太恭人文

嗚呼堂幼習于母家而筠珪年在毀齒始來京華拜儀  
部翁姥旣舅氏慈我有加我母痛王父母不相見而于  
叔父母兄弟尤往來相過也不弔癸亥秋我母瘵甚旣  
歿儀部公偕太恭人來哭臨實手斂之俾附身附棺可  
以無憾也及儀部公卒舅氏獨南行葬十餘喪而外王  
父母得歸于鄉此先母未瞑之遺志舅氏實成之而先

君常爲堂等言汝三舅難得其後必昌也舅氏官于西  
奉太恭人以行其後收酒泉出玉門關歷和闐念太恭  
人老且病歸養于天津天津徐氏之別業在焉太恭人  
倦于四方將以是撫子孫而頤其天年也舅守太原而  
戊子秋珪以陳臬來明春珪遷于藩而舅擢冀寧監司  
比鄰而朝夕者六年于茲矣舅雖賢勞于官其心無日  
不在慈幃也屢欲陳情引去珪固畱之今年六月珪以  
勘水北行歸未至般虎口四十里得舅書曰太恭人棄  
我我卽行不及待子矣珪三日夜馳七百里比至而舅  
氏先一日行不及晤嗚呼使舅氏抱終天之恨者珪之

故也與舅氏相聚數年而倉卒別去聚散之感黯然不可爲懷而瞿然可悟也筠之子女與太恭人之曾孫子女世爲婚姻舅氏將生子卜其名曰朱所以識兩家之德澤而慰太恭人于在天也道里睽隔敬陳樽酒臨風寄誄太恭人其鑒之否

行狀

劉母王太君行狀

曾祖考某曾祖妣某氏

祖考某祖妣某氏

考諱枚士常州府同知妣解氏封宜人

劉君端明將葬其母王太君有日乃走書千里述母之  
貞苦大略而請珪爲狀珪習於仲兄暨先嫂劉孺人時  
聞母之行實舊矣不敢辭謹案太君母家世居寶坻爲  
望族太君生而孝謹得父母心年二十歸同縣劉府君  
諱維藩府君曾大父諱兆麟以子殿衡貴

誥封光祿大夫大父諱殿颺進士父諱宣詔候選州同  
知生子三而府君爲長穎敏好學刻苦致疾太君事之  
甚謹越五年而府君疾不起時太君年二十有五矣有  
一女四歲長子端宸三歲次子端明數月耳太君慟絕  
者久之五日水漿不入口舅姑有痰疾哭子乃更劇姑

陳太君忍泣而責新婦曰此數呱呱者豈老人所能勝耶汝舅聞哭聲則氣逆不可下奈何太君吞聲起強進飲啜事舅姑益勤日夕禱天爲二老益算舅疾既有間自授長孫書太君恐其煩也則時督之因識其某字某聲映紙鉤出以教次子及端明爲諸生曰吾之識字母教也其教女也尤肅劉孺人歸予仲兄垣勤儉靜謐不苟言笑而天性孺慕蓋太君愛之篤而必率以禮也其事母解宜人也最孝解宜人年旣高見太君則寢飯安顏色喜以故太君兄詢舜輔公欲得太宜人之歡心必迎太君歸侍之蓋終身無間云其視夫之兩弟甚友叔

某之子喪母撫之如子提攜小叔某亦如之太君早歷艱苦中間持家計尤瘁晚而劉孺人卒其家祕之不敢告然輒形於夢太君心知之遂不復問如是者七年及端宸客亾太君哭已收泣曰吾老矣豈以自殞乎蓋幾於達矣太君生平言動有矩則貞孝友慈勞苦困阨幽習而未光豈天之佑善遲久蓄積必有待於後耶太君生於某年月日卒於某年月日享年若干守節若干年乾隆十八年得旌於朝子二端宸先卒娶某氏端明增生娶某氏某氏女適辛未進士山東長清縣知縣朱垣孫幾人某某女孫幾人將以某年月日葬於某所

謹狀

哀詞

臧禮堂哀詞

禮堂自號愛日居士學優而行孝友年三十卒其兄鏞  
堂哭之哀爲詞以釋之

嗟臧孫之愛日兮何白日之忽催豈黃楊之戾閏兮天  
澗底之條枚哲兄弟淫淫而濡筆兮哽不能抒其中懷  
曰子弟孝于孀閔兮生命促于淵回父喪三年不入內  
兮判股肉而起北陔兄弟若師友兮著錄富于鞶韞辨  
小學于蒼斯兮精竭計之奇核孰揮月斧而碎雙璧兮

卞抱厥而兀王駘祈仁人爲之闢幽兮掘豐獄而呼張  
雷我聞其言三太息兮憐膏桂之明材羌滅氏之達人  
兮溯武文與僖哀德音功其不朽兮有其二而何歎況  
文士之多阨兮噫大塊乎大紇



知是齋文集卷第六